



Uunga siunnersuut: Aningaasarsianit akileraarutit pillugit Inatsisartut inatsisaata allanggortinneqarnera pillugu Inatsisartut inatsisaat nr. xx, xx. xxx 2018-imeersoq. (Kalaallit Nunaanni soraarnerussutisiaqalernissamut aningaasaateqarfinni soraarnerussutisiaqalernissamut ileqqaakkanit iluanaarutit akileraarusersorneqartarunnaarnissaat, inuussutissarsiutigalugu umiatsiaaqqamik aalisarnermi nalikilliliinermut malittarisassani allannguutit, nuussinernik nakkutigisanik uppernarsaanissamut il.il. piumasaaqaatit aamma nunamit nunamut nalunaarusiornerit il.il.)

(Aningaasaqarnermut Naalakkersuisoq)

(Siullermeerneqarnera)

Siunnersuutikkut kissaatigineqarpoq akissarsianut akileraarut pillugu inatsisip allanggortinnissaa aaqjiinissarlu. Siunnersuut manna aqutigalugu Kalaallit Nunaanni isertitat pilersinneqartut, Kalaallit Nunaanni akileraaruserneqartarnissaat Naalakkersuisut pingaarnertut kissaatigaat. Tunngavik tamanna Demokraatini isumaqatigaarput.

Ilaatigut akileraarutitigut iluanaarniapiluttoqarsinnaanera pillugu Naalakkersuisut kissaatigaat uppernarsaatit pillugit malittarisassiorsinnaanissamut pisinnaatinneqarnissartik. Tassani Naalakkersuisut oqarput, piginnaatitsissutikkut tassuunakkut malittarisassanik OECD-p transfer pricingimik uppernarsaasiinermut kaammattuutaanut naapertuuttunik kinguneqassasoq naatsorsuutigineqartoq.

Uppernarsaasiineq tamanna akileraartarnermut ingerlatsiviit suliffeqarfinnik nuussinernillu aarlerinaatitigut naliliinissamut periarfissinneqarnissaat kiisalu nuussinernut Kalaallit Nunaannut akileraarnaveersaarnernut atorneqarnissamut aarlerinaateqarnerpaanut akileraartarnikkut nakkutilliinermik aallussilluni suliaqarnissamut periarfissiinissamik siunertaqarpoq.

Demokraatini siunnersuut tapersorsorparput oqaatigerusulluguli malittarisassiornermi OECD´p innersuussutai aallaavigineqassasut. Taamaattumik naammangilaq Naalakkersuisut tassunga naatsorsuutiginninnerat.

Inuussutissarsiutigalugu umiatsiaararsorluni aalisarnermut aammalu takornariartitsinermik angallammillu attartortitsisarnermik inuussutissarsiornermik ingerlataqartunut atatillugu aquuterallannik nalikilliliinermi malittarisassat sakkukillineqarnissaat pillugu siunnersuummut tunngatillugu, siunnersuut tapersorsorluinnarparput. Tamanna inuutissarsiortunut oqilisaanertut isigaarput ikorfartuissammat namminersorlutik inuutissarsiortut atugaasa oqilisarnissaannut - taakkunanga iluaqusiisussamik aammali inuiaqatigiinnut naliginnaasumik. Taamaattumik Naalakkersuisut kaammattorusuppagut eqqarsaatigeqqullugu manna siunnersuut ilaneqarsinnaannginnersoq inuutissarsiortut amerlanerusut iluaquserneqarsinnaanngorlugit? Eqqarsaat tamanna Demokraatit Aningaasaqarnermut Akileraartarnermullu Ataatsimiititaliami assut eqqartorusupparput.



Demokraatini qularingilarput inuutissarsiortut namminersortut atugaat pitsaanerulerpata aningaasarsiornikut siuariartortoqalissasoq, suliffeqarfiit aningaasanik sinneqarnerusalernerisa kinguneranik siuariartorneq nutaaliornierlu pilersinneqassammata aamma suliffinnik amerlanerusunik nassataqartussa - naggataatigullu pisortat karsiinut iluaqusiilluni akileraarutit pissutigalugit.

Demokraatini Kalaallit Nunaanni soraarnerussutisianik katersiviit nunatsinni ingerlatseqatigiiffinnit iluanaarutisianik pissarsiaminnit iluanaarutisianut akileraartarunnaarsinneqarnissaannik Naalakkersuisut kissaateqarnerat tusaatissatut tiguarpud. Naallu siunnersuut tamanna pinngitsoorani soraarnerussutisiassanik katersisarnissamut tunngasoq UKA 2016-mi oqaluuserineqartumut imm. 19-nut imatut tunngassuteqanngikkaluartoq erseqqissaassutigerusupparput, innuttaasut ilaasa aqqissuussinerup atulersinneqarnissaa aklerimmassuk. Manna periarfissaq iluatsillugu oqaatigissavarput Demokraatini pissusissamisoortutut isigigatsigu, sapinngisamik amerlanerpaat, imatut paasillugu inuit tamarmik, aningaasatigut imminnut qularnaarsimasarnissaat toqqissisimallutik utoqqalinerminni inuusinnaasarnissartik qulakkeerumallugu. Taamatulli oqareerluta apeqquuserparput tamanna inatsisit aqqutigalugit pisortanit qularnaagassaanersoq imaluunniit inuit ataasiakkaat tamanna akisussaaffigisariaqanngikkaluarneraat?

Demokraatini isumaqarpugut ullumikkut inatsisit amerlavallaarujussuurtut innuttaasunik oqaasissaarutsitsisut. Tamanna politikikkut namminiilivinnissamik siunertaqarnitsinnut tulluutinngilaq, tassami sutigut tamatigut nammineersinnaanerup pilersittarmagut innuttaasut akisussaassuseqartut aamma annermik inuttut kiffaanngissuseqartut. Tamanna tunngavigalugu Naalakkersuisut kaammattorusuppagut sutigut tamatigut innuttaasut akisussaassuseqarnissaat siuarsarniartaqqullugu tamanna aqqutigalugu politikikkut namminiilivinnissaq pitsaanerpaamik tunngavissaqalersikkumallugu.

Taama oqaaseqarluta siunnersuutip Aningaasaqarnermut Akileraartarnermullu Ataatsimiititaliamut innersuupparput.